

皇明典禮志

皇明典禮志卷之九

江夏

郭

正統九年

皇帝大婚

天子大婚國初僅具儀耳多沿唐典未之行也歷成
仁宣俱以潛邸行禮正統中

英宗納后始定大婚儀注歷代因之

正統七年五月定納采問名前期擇日遣官告天地
宗廟至期前一日所司設御座于奉天殿鴻臚寺
設制案節案於御座前內官監禮部陳禮物於文
樓下教坊司設中和樂於殿內屆期錦衣衛設鹵

簿禮部陳禮物於丹陛上及文樓下設綵輿於奉
天門外教坊司設大樂於奉天門內鼓三嚴鐘止
上具冕服陞座文武官執事引正副使朝服四拜傳
制官奏傳制執事舉制案節案由中門出禮物隨
之傳制官宣制曰茲選某官某女爲皇后命卿等
持節行納采問名禮正副使四拜

上與制案節案由奉天門中門出至門外正副使以
制書置綵輿中儀仗大樂前導中道行出大明門
外正副使釋朝服乘馬行詣

皇后第行禮

皇后第前一日設正副使幕次于大門外左南向設
香案於正堂設制案節案于南別設案於北其日
正副使至大門外儀仗大樂分別列置綵輿於中
設制案節案於輿北引禮導正副使入幕次執事
官陳禮正副使出幕次奉制書于案禮官先入立
于東主婚者朝服出立于西禮官曰奉制建后遣
使行納采問名禮主婚者出迎引禮導正副使捧
制書及節先行主婚者隨至堂置制書及節於案
正使立案左副使立案右引禮導主婚者四拜詣
案跪正使取納采制宣曰朕承天序欽紹鴻圖經

國之道正家爲本夫婦之倫乾坤之義實以相宗
祀之敬協奉養之誠所資惟重祗遵聖祖母太皇
太后

聖母皇太后命遣使持節以禮采擇宣訖授主婚者
主婚者授執事者置于案左副使取問名制宣曰
朕惟夫婦之道大倫之本正位乎內必資名家特
遣使持節以禮問名尚佇來聞宣訖授主婚者主
婚者授執事者置于案右主婚者俯伏興執事者
舉表案以表授主婚者主婚者受表跪授正使表
曰臣某伏承嘉命正使其官某等重宣制詔問臣

名族臣女。臣夫婦所生先臣某官某之玄孫先臣某官某之曾孫先臣某官某之孫先臣某官某之外孫臣女今年若干謹具奏聞。主婚者俯伏興退四拜禮畢。正副使出置表綵輿中。主婚者前曰。請禮從者酒饌畢。主婚者奉幣以勞正副使。正副使出。正副使進發綵輿于大明等門左門入。至奉天門外。以表節授司禮監。奏聞復命。

納吉。納徵。告期。傳制。遣使。並如納采。問名。儀用玄纁束帛六馬。穀珪制詞曰。茲聘某官某女爲皇后。命卿等持節行納吉。納徵。告期禮。

皇后第前更設玉帛案其日正副使至
皇后第以制書玉帛置案上執事先設

皇后冠服諸物於正堂六馬陳堂下禮官入主婚者
出見禮官曰奉制聘

皇后遣使行納吉納徵告期禮主婚者出迎執事舉
玉帛案正使捧納吉納徵制書副使捧告期制書
及節次行主婚者隨至堂置於案左右立置玉帛
案於南主婚者四拜詣案前跪正使取制書宣曰
大婚之上龜筮師士協從敬修禮典遣使持節告
吉又宣曰卿女有貞靜之德稱母儀之選宜共承

天地宗廟特遣使持節以禮納徵宣訖授主婚者
主婚者授制以授執事者正副使捧圭授主婚者
主婚者以授執事者副使捧玄纁授主婚者主婚
者以授執事者執事者俱跪受置於北案副使取
制書宣曰歲令月良吉日某甲子大婚惟宜特遣
使持節以禮告期宣訖授主婚者主婚者受以授
執事者執事者跪受置於北案主婚者俯伏興四
拜正副使持節出主婚者請禮從者及捧幣勞正
副使如初正副使還復命

發冊奉迎前一日所司設樂儀仗如常儀至期鴻臚

寺設制書案節案冊案寶案於御座前。禮部陳鴈及禮物於丹陛上。設綵輿於奉天門外。內官監陳皇后。鹵簿車輅禮物於綵輿南。其傳制遣使並如納采問名儀。制詞曰。茲冊某官某女爲

皇后。命卿等持節奉冊寶行奉迎禮。其制冊寶節用傘蓋遮護中門出。執事舉鴈及禮物。正副使隨詣皇后第行禮。鼓吹前導。設而不作。教坊司作樂如常儀。是日內官設

皇后幕次於內殿。南北向。設

上與

皇后各更服處於內殿。

皇后第前一日設正副使幕次于大門外南向設香案制書案節案冊寶案于正門中又設于正堂別設案于堂北其日正副使至取制書冊寶置案上女官奉

皇后九龍四鳳冠首飾褙服入中堂左內官陳儀仗車輅諸物于大門內禮官先入主婚者朝服出見禮官曰奉制冊

后遣使持節奉冊寶行奉迎禮主婚者出迎執事者舉案前行正副使捧制書及節執事者以鴈及禮

物從之。主婚者從至堂正。副使置制節於案。執事者置冊寶案於制節案之南。冊東寶西。左右立。主婚者四拜退。立於西南。女官以冠服進。

皇后內官進儀仗於中堂前。設女樂于堂下。作止如常儀。司禮監官進前受節冊寶。正副使於案取授之。內贊二人導入中堂前。置于案。

皇后具服出閣。女官官人擁詣香案前。向闕立。內贊贊四拜。贊宣冊贊跪。

皇后跪宣冊官立。宣于左。贊受冊。贊揖主宣冊官以冊進。授皇后。皇后以授女官。女官跪受。立于西。贊宣寶。宣寶

官立宣于左。贊受寶。宣寶官以寶授。

皇后。皇后以授女官。女官跪受。立于西。贊出。圭贊與贊四拜禮畢。

皇后入閣持節。監官由正門出授。正副使報受冊寶。禮畢。引禮導。主婚者詣案前跪。正使取制宣訖。授主婚者。主婚者授執事者。以鴈及禮物進。副使以次受之。授主婚者。主婚者授執事者。皆置于案。又贊四拜禮畢。正副使出。置節綵輿中。主婚者請禮從者如初。司禮監官整鹵簿。復以奉迎禮。達于女官。女官請。

皇后冠服出閣。女樂前導。官人擎執擁護。自東階下立香案前。內執事贊四拜。陞堂南向立。主婚者進立于東西向。曰。戒之敬之。夙夜無違。退立于東階。毋進立于西東向。施衿結帨。曰。勉之敬之。夙夜無違。退立于西階。內執事請乘輿。

皇后降階升輿。內執事導從出門。儀仗大樂前行。次絲輿。正副使隨次。司禮監官擁導。

皇后鹵簿冊寶絲輿從大明門中門入。文武百官朝服於承天門外班迎。候輿入乃退。

皇后輿輅至午門外。鳴鐘鼓鹵簿止。正副使以節授

司禮監官復命。捧冊寶官捧冊寶。儀仗女樂前導。官人擁輿。後由奉天門進內庭幕次。監官以冊寶授女官。

皇后出輿。由西階進。

上由東階降。迎於庭揖。

皇后入內殿。

上詣更服處。具袞冕。

皇后詣更服處。更禮衣。同詣奉先殿行禮。女官以冊寶置

皇后宮中。內官以車輅鹵簿入午門。過御橋。由中右

門進

皇后宮中。

謁廟。是日早內官於奉先殿陳設牲醴祝帛畢。俟上同。

皇后至。

上東。

皇后西行禮如常儀。祭畢還宮合卺。是日內官先於正宮殿內設上座于東。

皇后座于西。相向置酒案。置四金爵兩卺。謁廟還。

上與

皇后各就便服處。

上服皮弁服陞內殿。

皇后更衣從陞贊請陞座執事者舉饌案於前女官司尊者取金爵酌酒以進飲訖進饌舉饌訖再進金爵酌酒以進飯訖進饌女官以盞盞酌酒合和以進飲訖又進饌舉饌畢內侍奏禮畢

上同

皇后興就更服處易常服

皇帝從者餽

皇后之饌。

皇明典禮志卷之六
皇后從者餞

皇帝之饌 朝見兩宮次日早

上冕服

皇后禮服詣 某宮俟某宮禮服陞座贊引導

上與

皇后詣 某宮前宮人以服脩盤立于

皇后左贊禮贊拜

上與

皇后皆四拜執事二人舉案至某宮前正中宮人以

服脩盤授

皇后。

皇后捧置于案女官舉案。

皇后隨舉進至某官前復位贊禮贊拜

上與

皇后皆四拜執事者舉服脩案徹于西贊禮畢還官

謝恩三日早

上冕服。

皇后禮服同詣某官前行八拜禮訖。

皇后詣內殿俟

上服皮弁服陞座女官導

皇后展衣詣

上前行八拜禮畢。

皇后還宮陞座引禮導在內親屬贊八拜禮次六尚等女官贊八拜禮。次各監局內官內使行八拜禮畢。是日

上御奉天殿頒詔布告中外。行禮如常儀。

受賀四日文武百官具朝服上表慶

上具袞冕御華蓋殿親王先行八拜禮慶賀。次執事官行五拜禮鴻臚寺奏請陞殿百官進表行禮如常儀。其親王行禮畢詣殿內。其官皇后前俱行

慶賀八拜禮出。是日某宮各具禮服陞內殿受
內外命婦慶賀禮。外命婦進表如常儀。

皇后禮服陞殿受內外命婦慶賀禮。外命婦進箋如
常儀。盥饋五日。清晨尚膳監具膳羞。

皇后具禮服詣某宮俟膳至。贊引導。

皇后詣某宮前贊四拜。尚食以膳授。

皇后。

皇后捧膳進于案復位。贊四拜。贊引導。

皇后退立于西南。俟膳畢引出詣某宮進膳如前。
儀畢還宮。時以英國公張輔爲正使。大學士楊士

奇爲副使持節行納采問名禮成國公朱勇爲正使大學士楊溥吏部尚書郭璉爲副使持節行納吉納徵告期禮又張輔爲正使楊士奇既戶部尚書王佐爲副使持節行發冊奉迎禮共詣中軍都督府都督同知錢貴宅行禮

天順八年

憲宗聘

皇后吳氏以會昌侯孫繼宗爲正使大學士李賢爲副使懷寧侯孫鏜爲正使吏部尚書馬昂爲副使又繼宗正使賢既禮部尚書姚夔副使

正德元年七月納

皇后夏氏命英國公張瑄爲正使大學士劉健爲副使持節納采問名保國公朱聰爲正使尚書李東陽謝遷爲副使納吉納徵告期八月以懋爲正使劉健禮部尚書張昇爲副使奉冊寶奉迎至都督同知夏儒宅行禮

嘉靖元年納

皇后陳氏命國公徐光祚爲正使大學士楊廷和爲副使持節行納采問名武定侯郭鄖爲正使大學士蔣冕費宏爲副使納吉納徵告期成國公朱輔

爲正使。廷和暨大學士毛紀爲副使。奉冊寶奉迎。詣鴻臚卿陳萬言宅行禮。俱如儀。

皇太子婚禮

洪武元年十二月定。皇太子婚禮前期。司天監擇日納采。奏請命某官爲使者。某官爲副使。前一日內使監設御座香案于奉天殿如儀。禮部官陳鴈及禮物于丹陛上。侍儀司設承制官位于殿上御座東。及丹陛東南設使者及副使拜位于丹墀內道之西。東上北向贊禮二人于丹陛上之南。司贊二人于使者拜位之北。知班二人于司贊之南。俱東

西向引使者二人位于使者拜位之北。西立東向。設執鴈及執禮物者于丹陛下之西。東向。金吾衛陳甲士儀仗于午門外。拱衛司陳儀仗于丹墀。和聲郎設樂于丹墀不作。侍儀司陳儀仗大樂于奉天門外。質明鼓初嚴。百官具朝服。次嚴引禮官導使者朝服立丹墀之西。三嚴。

皇帝服袞冕陞御座。引禮導使副就丹墀拜位。四拜。興。承制官承制訖。出宣制使副跪宣制曰。奉制納某氏爲皇太子妃。命卿等行納采禮。使副俯伏興。四拜。引禮導使副退立于西。執鴈及執禮物者由

西階陞自中陞。降至奉天門外。儀仗鼓吹導以行。駕興。百官以次出。納采前一日。有司設使副次于妃氏門外。南向。屆期。使者奉制執鴈及禮儀至第。引禮導入次。執事者陳于門。儐者導主婚者朝服序立于大門內東向。使者出立于東。執鴈者立于南。皆西向。儐者出詣使者前曰。敢請事。使者奉制曰。儲宮納配。屬于令德。邦有典常。使某行采擇之禮。儐者入告。主婚者曰。臣某之子昧於壺儀。不足以備采擇。恭承制命。臣某不敢辭。儐者出告訖。入導主婚者迎于門北面立。贊再拜。使者不答拜。

主婚者揖使者先入立于西階下。陞自東階立于香案東。執鴈者立于南。執事者陳禮儀于庭。儼者導主婚者就拜位。四拜陞自西階至香案前。使者曰有制。主婚者跪。使者宣制曰某奉詔納采。執鴈者以鴈進。使者以鴈授主婚者。主婚者跪受鴈興。以授左右。降自西階。就位四拜禮畢。退于西階。使副降自東階以出。問名使副納采既出。立于中門外之東西面。主婚者立于西階下。儼者進受命出詣使者前曰敢請事。使者曰儲宮之配采擇既諧。將加卜筮。奉制問名。儼者入告。主婚者曰制以

臣某之女可以奉侍儲宮。臣某不敢辭。儼者出告訖。入導主婚者出迎。使副于中門外北面再拜。使者不答拜。儼者導主婚者先立于西階下。使副入門。陞自東階。立于香案左。執鴈者立于使者南。皆西向。執事者陳禮儀于庭。儼者導主婚者再拜。陞自西階。至香案前北面立。使者曰。有制。贊跪。使者曰。臣某奉詔問名。將諸卜筮。主婚者曰。臣某第幾女某氏出。執鴈者以鴈進。使者以鴈授主婚者。主婚者跪受鴈。興以授左右。自東階降。就位再拜禮畢。退立于西。使者降自階。立于中門外之東。儼者

受主婚者命。詣使者前請曰。某公奉制。命至某之室。請禮從者。使者曰。某旣得從事。敢辭。儼者入告。主婚者曰。先人之禮。敢固以請。儼者出告。使者曰。某辭不獲聞。命敢不從。導使者入陞階。卽座宴。主婚者奉幣。禮使者畢。使者還告吉。

皇帝御奉天殿。遣使納吉。如納采儀。使者奉制執鴈及禮物至妃氏第。儀仗鼓吹列于大門外。使者入執事者陳禮物。儼者請事如前。使者曰。謀諸卜筮。其占協從。制使某告吉。儼者入告。主婚者曰。臣某之子愚懼弗克堪。卜筮云吉。惟臣之幸。臣謹奉典

制儐者出告訖。入導主婚者出迎。北面再拜。揖使者先入。立于西階之下。引禮導使者入。陛自東階。立于香案左。執鴈者立于南。俱西向。執事者陳禮物于庭。儐者導主婚者就拜位。北向再拜。自西階。陛至香案前。使者曰。有制。主婚者跪。使者宣制曰。奉制告吉。執鴈者以鴈進。使者受鴈。以授主婚者。主婚者跪受鴈。興。以授左右。降自西階。再拜禮畢。導主婚者退。立于西。導使者出。立于中門外之東。儐者出。禮使者如問名之儀。納徵前一日。有司陳設如納采儀。其日。使者奉玄纁。束帛。穀圭。至妃

氏第儀仗分列于門。設玉帛案于廳。饋者請事如儀。使者曰。卜筮不違。嘉偶既定。制使某以儀告成。饋者出告訖。入導主婚者出迎于門外。北面再拜。使者不答拜。主婚者揖。使者先入。立于西階下。引禮導使副入。執事者以玉帛案置于香案北。使者立于案左。奉玉帛者立于使者南稍後。執事者陳禮物于庭。主婚者再拜。陞自西階。使者曰。有制。主婚者跪。使者宣制曰。某奉制告成。奉玉帛者取玉帛。使者受以授主婚者。主婚者跪受。興以授左右。降自西階。再拜禮畢。主婚者退。立于西。使副降自

東階以出。請期如納吉儀。辭曰。詢于龜筮。某月某日吉。制使其告期。主婚者曰。敢不承命。既請期。遣官以特牲告。

太廟遣使奉冊儀前期。司天監擇日。翰林院撰冊文。工部造冊寶。諭翟首飾車輅儀仗。禮部備禮物。以某官爲授冊授寶使。某官爲奉冊奉寶官。某官爲主節官。承制官。屆日。鼓初嚴。百官具朝服。導駕官侍從官入。次嚴。禮部官陳絲輿于奉天門外。陳車輅儀仗冠服諸物於輿南。引禮導冊寶使朝服入。

三嚴

皇帝具袞冕至奉天殿陞座冊寶使以下皆四拜承制官承制出宣制主節官率執節者由中門出中陛降立于使者之東北西向舍人舉冊案奉冊官從舉寶案奉寶官從由中門出校尉擎紅羅蓋護冊寶由中陛降置于丹陛正中引禮導冊寶使前詣丹陛下正中北向立承制官宣制曰冊某氏爲皇太子妃。

皇帝制命爾等持節奉冊寶行冊禮宣制訖執節者脫節衣以授主節官主節官以授冊使冊使跪受以授執節者奉冊官以冊授冊使冊使受冊興置

于案出笏退復位。奉寶官亦復位。退就拜位。北向立。承制官入奏訖。贊拜使者四拜禮畢。各舉案出奉天門。執節者前導至門外。使者取冊寶置綵輿中。由午門中門出。前儀衛次車輅。次冠服。次禮物。次冊寶。輿使者後至。皇太子妃第。儀仗鼓吹列于門。偻而不作。陳綵輿于門外正中。鹵簿儀仗及鳳輶以次列于門。冊寶使就次大門外。內使監官就中門外次。官人先奉妃首飾褙衣入。就閣外次。儉者導主婚者朝服立于大門內之西。內使監官序立于中門外。引禮導冊寶使副出次。詣綵輿以

冊寶置于案。立于大門外之東。執節者立於其北。儐者請事。使曰。某奉制授皇太子冊寶諸物。儐者入告。主婚者曰。臣謹奉制。儐者出告。訖入導主婚者迎于大門外北面。主婚者再拜。使副不答拜。揖入持節者前。舉案者次之。使副從至中門外。各就位立。持節者脫節衣。使者以冊授監官。監官以授內侍。副使以寶授監官。監官以授內侍。舉案者以案退。使副亦退。內侍奉冊寶由中門入。監官後從至閣門外。以冊寶權置于案。宮人奉妃首飾綸翟入閣。請妃具服。傅姆宮人內侍導妃出閣正中。至

閣門外。傅姆導妃降自東階。詣香案前。向闕立。傅姆左右立。監官曰。有制。典內啓妃再拜受冊。監官以冊授妃。妃受冊。以授宮人。宮人受冊。立于妃左。受寶如受冊儀。宮人授寶。立于冊下。妃再拜請陞座。傅姆導妃由東階陞。卽閣正中座。宮人奉冊寶。置于案內。侍導官以下。各就庭下位。重行北。向立西上。司贊贊拜。皆四拜禮畢。妃降座還內。主婚者禮使副如告期儀。醮戒儀。前期侍儀司設皇太子次于奉天殿東房。皇太子席位於奉天殿之西。東向其席。筵紛純加藻席。纈純設司爵內使二。

人司饌內使二人於左右。是日未明。東宮侍從官導從皇太子至。次皇太子具衮冕服。文武官侍立。皇帝服通天冠絳紗袍。御殿引進導。皇太子由東陛至丹陛。位贊四拜。由殿東門入。就席位。東向立。司爵內使以觶進皇太子。跪。搢圭受觶。祭酒以觶受內使。司饌內使以饌授皇太子。皇太子受饌以授內使。興就席坐。飲食訖。導詣御座前跪。

皇帝命之曰。往迎我相承我宗事。勗帥以敬。皇太子曰。臣某謹奉制旨。俯伏興由東門出。至丹陛上。四拜禮畢。

皇帝還宮。引進導皇太子由東階降。文武百官以次出。親迎儀。前一日有司設皇太子次于妃氏大門外南向。東宮官次于南東西相向。設皇太子立位于大門外東西向。奠鴈位于閣門北向。主婚者立位于閣門外之西東向。主婚者于質明具酒脯告于家廟。先是東宮官具朝服陳鹵簿鼓吹于東宮門外。啓內嚴。東宮官奉寶詣閣奉迎儀鸞司進金輅于門內。啓外辨。皇太子冕服乘輿以出。侍衛導從如常儀。至官門降輿陞輅。輅動。東宮官以下皆從。執鴈者奉鴈從皇太子至妃氏門外回轅南。

向鹵簿鼓吹左右分列皇太子降輅陞輿侍從導
至次降輿入就次東宮官就次先是皇太子將至
主婚者設會宴女皇太子旣入妃服褕翟花釵就
閣南向立傳姆立于左右主婚者具朝服立于西
階之下引進導皇太子出次立于大門之東西向
儗者朝服進受命出立于門東西面曰敢請率引
進跪啓訖皇太子曰某奉制親迎引進受命興承
傳于儗者儗者入告導主婚者出迎于大門外東
西再拜皇太子答拜引進導皇太子入門而左執
鴈者從之儗者導主婚者入門而右皇太子陞東

階進立于閣門戶前北向立主婚者陞西階立于西東向引進啓奠鴈執鴈者以鴈西向皇太子擯主受鴈以授主婚者主婚者揖笏跪受興以授左右退立于西皇太子出主俯伏興再拜降自東階出至次以伺主婚者不降送初太子入門妃母出立于閣門外奠鴈位之西南向皇太子拜訖宮人傳姆導妃出立于母左主婚者進命之曰戒之戒之夙夜恪勤毋或違命母命之曰勉之勉之爾父有訓往承惟欽庶母申之曰恭聽父母之言宮人傳姆擎執導從妃出門司閨啓妃乘輿出中門降

輿乘鳳轎皇太子揭簾所司陳列鹵簿如式妃出
內門至輅後皇太子出大門陞輅輅動東宮侍從
官皆從行如來儀至東宮門外侍從官入皇太子
車輅至門內降輅乘輿以入侍從官從至閣皇太
子降輿入俟于內殿門外之東西面合卺前一
日內使監設妃次于東宮內殿之西南向司閨設
幄于內殿正中設皇太子座于東妃座于西設皇
太子洗于殿東南設妃洗于殿北西設酒案于幄南
陳酒尊設四爵兩盞設食案于樽北其日晡後妃
至內使監于內殿設步障地衣至幄內伺妃輅入

東宮門各擎執擁護入至內殿前司閨啓妃降輅
陞輿至幄次降輿行傳姆導妃入次整飭司閨導
妃詣內殿門西東面內侍導皇太子揖妃以入皇
太子先妃後入內殿皇太子就洗位盥手就座前
西向立妃詣盥所盥手就座前東向立皆座司饌
官人各舉食案進于前皆食訖徹饌司醢官人取
爵酒進于前皆飲訖司饌再以饌進饌訖徹饌司
醢再以酒進飲訖徹饌三饌訖司醢取盃酌酒以
進各受盃飲訖徹盃禮畢皇太子及妃皆與內侍
及官人導從皇太子司閨及傳姆官人導從妃入

宮皇太子更禮衣。妃服常服。皇太子從者。餞妃之。餞妃從者。餞皇太子之。餞妃朝見儀。其日妃夙興。沐浴服綸翟首飾。司閨啓出闔。妃出至內宮門。陞輅至內東門降輅。內使及傅姆導妃入宮。至內殿陛下。

皇帝服通天冠絳紗袍。卽御座南向。司閨導妃入北面立。內贊贊妃再拜。導自西階陞。宮人奉棗栗笄進至御座前。以授妃。妃奠于御前。尚食徹以東。降自東階復位。北面再拜禮畢。詣

皇后殿立于閣外。

皇后褙衣卽南向座司閨導妃入詣殿北向立內贊贊妃再拜由西階陞官人奉殿傍筭以從至

皇后御座前北向立供手

皇后御座前尚食徹以東降自東階復位再拜禮畢傳姆導妃退

皇帝

皇后醴妃如中宮之儀明日行盥饋禮其日妃夙興服褙翟衣至

皇帝閣外入于庭北面內贊贊妃再拜導陞自階至御座前尚食官人以膳授妃妃受膳進

皇帝前降自西階。復位再拜禮畢。詣

皇后殿。盥饋如儀。

皇帝

皇后饗妃如朝見之儀。既畢。擇日謁廟。

上曰。贊禮不用筭。用金盤。古禮有親迎。執綏御輪。今
既用輜。則揭簾是矣。其合卺。依古制。用匏。鴈以玉
爲之。妃朝見入宮中。乘小車以帷蔽之。謁廟。則皇
太子俱往。禮成。後三日。乃宴群臣。命婦。餘如所定
儀。

洪武四年夏四月。以皇太子將行婚禮。先期告四廟。

各用犢一祝文曰深荷祖宗積德福延後嗣今長
子標年已長成謹擇今月二十六日與開平忠武
王常遇春女常氏爲婚敢用祭告冊寶俱用金與
皇太子同寶篆文曰皇太子妃之寶冊文真書鐫
刻之曰昔君天下者必重後嗣爲蒸民主皆選勲
德之家貞良子女以媿之朕子標年已長成以爾
常氏實朕功臣開平忠武王長女今吉日在期先
正其名特以冊寶命爾爲皇太子妃尚其思爾父
勲敬慎內儀相以正道用永于家邦

成化二十二年九月乙卯禮部言皇太子親迎出入

宜從大明左門或東長安門。

上命由東長安門行。更定婚儀。納采問名。先期擇日遣官告太廟。牲用犢各一。

上御奉天殿傳制。執事舉節案制案由左門出。置丹墀中。

上興節案制案由奉天門左門出。執事導文樓下禮儀隨出。奉天門外。正副使以節制書置綵輿中。儀仗大樂前導至東長安門外。釋朝服。行詣皇太子妃府。引禮導入幕次。執事官陳禮儀。正副使出幕次。以節制書置于案。禮官先入正堂立于東。主婚

者朝服立于西。禮官曰。奉制聘皇太子妃。遣使行納采。問名。禮引禮導主婚者出迎。正副使奉節及制書先行。主婚者後置節及制書于案。主婚者行四拜禮。詣案前跪。正使宣納采制授主婚者。主婚者以授執事者。置于案左。副使宣問名制授主婚者。主婚者以授執事者。置于案右。俯伏興。執事者舉表案于後少西。以表授主婚者。主婚者受表跪授正使。正使置于案。主婚者俯伏興。退就拜位。四拜禮畢。正副使出置絲輿中。主婚者前致詞。請禮從者。正副使發絲輿入至奉天門外。以節表授司

禮監官復命 納徵告期冊封先期一日遣官告
太廟至日早設鹵簿絲輿大樂傳制遣使禮儀如
納采問名儀設妃儀仗車輅于左順門外致詞曰
茲冊某官某女爲皇太子妃命卿等持節行納徵
告期冊封禮正副使至妃府以節制書冊玉帛置
于案執事先設皇太子妃冠服諸儀于正堂八馬
陳堂下禮官先入主婚者朝服出見禮官曰奉制
封皇太子妃遣使行納徵告期冊封禮主婚者出
迎執事舉玉帛冊案前行正使取節及納徵制書
副使取告期制書奉以行主婚者後至堂上各置

于案。退立于左右東西向。主婚者四拜。詣案前跪。正使宣納徵制書授主婚者。主婚者以授執事者。執事者跪置于案。正使捧圭授主婚者。主婚者以授執事者。執事者跪置于案。副使捧玄纁授主婚者。主婚者以授執事者。執事者跪置于案。副使宣告期制書授主婚者。主婚者以授執事者。執事者跪置于案。主婚者俯伏興復位。四拜禮畢。正副使入。次女官捧妃冠服于中堂左。內官陳儀仗車輅于門內。女官以冠服進。內官進儀仗于堂前。司禮監官進受節冊。正副使取節冊授之內官。二人導奉。

節冊官入中堂置于案。皇太子妃具服出閣。女官
官人擁詣香案前。向闕立。女官贊四拜。贊宣冊。贊
跪。皇太子妃跪。女官立。宣于妃左。贊受冊。贊稽主
宣冊官以冊進受妃。妃受以授女官。女官跪受于
右。立于西。贊出主贊與又贊四拜。禮畢。妃入閣。持
節監官由正門出。授正副使報受冊禮畢。正副使
出門外。置節綵輿中。主婚者請禮從者幣。勞如前。
使還至奉天門外。以節授司禮監官。復命。醮戒
如洪武儀。妃受醮戒。親迎日。妃服燕居冠服。父
母行詣祠堂行禮。奠酒讀祝禮畢。執事者具酒饌。

于內妃飲食訖。父母坐正堂。妃詣前各四拜。父命之曰。爾往大內。夙夜勤慎。孝敬母違。母命之曰。爾父有訓。爾當敬承。妃聽受訖。次詣諸親行禮畢。改服翟衣以俟親迎。親迎。皇太子受醮戒訖。至午門外幕次。易皮弁服。陞輅至妃家門。降輅至幕次。禮官先入至廳。立于東。主婚者朝服出。立于西。東向。禮官曰。皇太子奉制行親迎禮。引禮二人導主婚者迎皇太子于幕次外。內官二人導皇太子出幕次。皇太子入中堂不拜。內官以鴈進。皇太子奠于案。主婚者詣鴈案前八拜。皇太子先出至中門。

鳳輦入門內。妃出。皇太子揭簾。妃陞輦。皇太子陞輅前行。妃具儀從後行。由東長安門進。至午門外。妃儀從入左順門內。妃至。皇太子揭簾。妃降。皇太子先行。內執事以帷幕擁妃後行。俱步入左順門內。皇太子妃陞輅後行至宮門。皇太子降輿候妃至。皇太子妃降輦入幕次。合卺先于皇太子內殿各設拜位。皇太子至宮門外降輿入俟于殿門外。妃降輦。皇太子前妃隨之。贊拜。皇太子再拜。妃四拜。贊陞座。皇太子與妃皆陞座。女官以卺酌酒合和以進。凡三舉酒饌。贊拜如初。禮畢。從者交餞。

如儀。朝見次日早。皇子冕服。妃翟衣。同謁。

皇太后。

上及

皇后官先後各四拜。

上前進棗栗盤

太后

皇后前進暇脩盤如儀。

盥饋三日清晨。妃服翟衣

贊引導妃至

皇太后前詣

上位前并

牲醴祝帛每朔豕一。羊一。帛二。共一筐。賛引二人導皇太子。一人導妃。至奉先殿詣

祖玄皇帝皇后神御前。皇太子東。妃西。皆兩拜跪。亦揖圭。皇太子揖圭。贊進帛。贊獻帛。皇太子受帛。以獻授執事者。贊奠帛。執事者以帛奠于神御前。贊進爵。執事者以爵跪進于右。贊獻爵。皇太子受爵。以獻授執事者。贊奠爵。執事者以爵奠于神御前。贊俯伏興。皇太子俯伏興。妃亦興。贊復位。皆兩拜。次詣

懿祖皇帝

皇后

熙祖皇帝

皇后

仁祖皇帝

皇后

宣宗皇帝

皇后

英宗皇帝

孝莊皇后如儀贊詣讀祝位皇太子與妃詣讀祝位

跪皇太子跪妃亦跪讀祝訖俯伏興復位皆兩拜
贊執事者捧祝帛詣燎所皇太子與妃詣燎位禮
畢還宮 慶賀是日早

上具皮弁服御華蓋殿請陞殿導駕作樂陳設如常
儀文武百官具朝服四拜鴻臚寺官詣丹陛上跪
致詞曰某官某臣等恭惟皇太子嘉禮旣成益縣
宗社隆長之福臣某等不勝欣忭之至謹當賀又
四拜禮畢。

上起易服賜宴羣臣如冬至正旦之儀其日命婦
慶賀

皇太后。

皇后致詞曰。皇太子嘉聘。禮成。益縣景福。餘如儀。

皇太后賜宴。

成化二十三年正月。以保國公朱永爲正使。大學士劉吉爲副使。詣鴻臚卿張繼宅。行納采問名禮。二月。以英國公張懋爲正使。大學士萬安爲副使。行納徵告期禮。

東宮偏妃

洪武八年十二月。以兵部郎中喜山往中舍星吉監藏家行禮。不傳制。不發冊。不親迎。偏妃冠服如唐。

宋二品命婦翟衣繡翟八等冠用九翬二鳳內官
送冠服女官取妃妃母及中舍妻見中官八拜見
東宮妃四拜妃由御橋西板橋至右掖門東宮導
妃入謁奉先殿東宮皮弁服拜稍前妃拜稍後禮
畢東宮與正妃坐偏妃具服于東宮前四拜正妃
前四拜執事者于東偏設座命偏妃茶飯次日東
宮偏妃禮服詣

上位中宮東東稍前偏妃稍後各八拜。

親王婚禮

親王婚禮俱如皇太子其宣制曰冊某氏爲某王

妃發冊則曰行發冊禮。使者與主婚者致詞納采。曰某王之儷屬于懿淑。使某行采擇禮。問名詞曰。某旣受命。將加諸卜筮。奉制問名。主婚者曰。制以臣某之子。可以奉某王。不敢辭。納吉。使者曰。卜筮協從。使某告吉。主婚者曰。臣某之子愚弗克堪。卜貺之吉。臣與有幸。謹承典制。納徵。使者曰。某王之儷。卜旣協吉。制使某以儀物告成。請期。使者曰。某月日消吉。制使某告期。主婚者曰。謹奉命。其醮戒親迎。合巹朝見。盥饋。並如皇太子。盥饋畢。王與妃見東宮王。具皮弁服。妃服翟衣。詣東宮前行四拜。

禮東宮皮弁服坐受東宮妃翟衣立受二拜答二拜王與妃至妃家其日內官先以禮物往王與妃儀仗導從如常儀王先至妃府第妃父出迎王先入妃父從之至正廳王立于東妃父立于西王於妃父母前行四拜禮妃父母立受二拜答二拜禮畢王中坐其餘親屬見王四拜王皆坐受妃入中堂父妃坐妃四拜其餘序家人禮

二王婚禮

嘉靖三十一年十一月甲申禮部奏累朝親王婚禮
洪武年間以父婚子皆行禮禁中將之國而後出

外府弘治宣德間以兄婚弟移出外府既成婚而後之國今二王婚禮似當從

皇祖之制得旨于各府行禮三十二年正月壬辰大學士嚴嵩等請及春和舉行二王殿下婚禮上從之詔于仲春擇吉嵩又言府第淺隘外人易于相接在親王則可今日事體不同且俱在內成婚爲便

上謂嵩搖于外議命舉冊立事嵩言此舉天下臣民久所仰望今婚期已近且于宮內成婚其冊立候舉行

上批答曰。出府不可害及二王。害及朕卿等明言。嵩對言。儲貳名分未正。而又久居于外。雖應得者亦危疑。府第連接。僅隔一牆。從人衆多情。各爲主易生嫌疑。此在二王不可不慮者也。先朝有

太后在上。又有中宮東宮體勢增重。

主上尊安。今列后不在。至親惟有二王。乃俱出外。此在

聖躬不可不慮者也。上謂皆不足恤。人無能定天者。二子依分無再瀆。已亥禮部上二王婚儀言會典醮戒之詞有二。其一曰。往迎爾相。承我宗事。爲

承宗者言也。其一曰。往迎爾相。用承厥家。爲承家者言也。今留京所以承宗。封國所以承家。戒命之辭。伏俟裁廟成。古以三月。後世以三日。蓋先告祖考。而親迎合卺成。其爲妻。明日夫率以見舅姑。又明日盥饋于舅姑。成其爲婦。又明日率以見祖考。先後之序如此。累朝率與合卺同日。至成化中。東宮納妃。始改從古。宜以改定者爲正。朝見盥饋先朝有太皇太后。有皇太后。有中宮儀文各異。令二王率妃詣上前行禮。後宜于各母妃前行禮。以章婦順。又會典東宮不回門。親王回門。然

未有定期。今宜待之。國前一月擇日行。餘如舊。上覽之不悅。曰。旣曰王禮自依典制。何不同之有。第速降敕冊立太子。分別成婚。任爾等爲之。勿以煩朕。於是禮部遂擇日具冊立儀以請。

上以問大學士嚴嵩。嵩對所司豈敢不遵前奉

聖諭。俟明命處分。

上乃詔部臣曰。其遵朕初諭。

二月諭禮部。二王親迎。受醮戒于文華殿。賜爵如冠儀。東向賜坐。飲訖。跪。輔臣捧授戒命。不宣。用金龍牋書。于是禮官具儀。先一日內監設制案于文

華殿中。捧戒命置于案。設香案于制案之南。設王
拜位于香案前。設醺席于西東向。設幕次于殿之
東廂房。教坊司設大樂。錦衣衛設儀仗。俱于丹陛
之東西。內官光祿寺官。設酒果金爵案于殿內西
南隅東向。是日內侍導王先入幕次。具袞冕服。禮
部鴻臚寺官。啓受醺戒。王出幕次。導由殿東門入。
詣拜位。鳴贊。贊鞠躬。樂作。四拜興。樂止。贊行醺禮。
禮部鴻臚寺官。導王就醺席。樂作。坐定。樂止。執事
官舉酒果金爵案置于前。光祿寺官醺酒。鳴贊。贊
搢圭。王搢圭。樂作。禮部官舉爵進王。王受爵飲訖。

奠爵于案樂止執事官徹案鳴贊贊出主禮部鴻臚寺官啓就受戒命位王降席導詣拜位鳴贊贊王跪輔臣捧戒命授王王受以授內侍內侍跪受訖鳴贊贊俯伏興樂作四拜興樂止贊禮畢引禮導王出至承天門外幕次釋袞冕具皮弁服行親迎禮詔可捧制命元輔嵩

王次妃禮

洪武八年十一月甲子遣吏部侍郎張度爲正使工部侍郎孫度爲副使徵衛國公鄧愈女爲秦王次妃不傳制不發冊不親迎度等行納徵禮是日

上御奉天門。正副使入就拜位。儀禮司奏曰。吏部侍郎張度。工部侍郎孫敏欽。依詣衛國公鄧愈家行禮。五拜畢。出至次妃第。正使捧玉帛。副使捧玄纁。至正廳。其冠服擬唐宋二品之制。九翬二鳳冠。儀仗比王正妃減半。遣女官迎妃家請妃。內使擎執儀仗前導。由御橋西板橋至右順門。王皮弁服。導妃謁奉先殿。禮用羊豕。王東稍前立。妃西稍後行。禮如常儀。禮畢入宮。王與正妃正坐。次妃詣王前。四拜詣正妃前。四拜。次妃東坐。宴飲成禮。次日王常服。妃禮服候。

上中宮常服陞座王及妃詣

上前王在東稍前妃西稍後贊八拜又詣中宮前
八拜不用棗栗服條王至妃家引禮導王入正廳
王立于東西向妃母立于西東向王四拜妃母立
受二拜答二拜妃入中堂行家人禮。

公主婚禮

洪武二十六年重定公主婚禮納采問名壻家備禮
儀表文於家庭望闕再拜掌昏者奉至東華門次
行納采問名禮納吉壻家既卜吉備禮儀表文
陳于庭望闕再拜掌昏者奉至東華門納徵壻

家具玄纁玉馬表文及他儀命掌昏者奉至東華門請期壻家具禮儀表文詣東華門受冊誥前期告奉先殿用祝帛羊豕謁廟受冊

皇帝制曰古之君天下者有女必封爾次女今已成入未有封號特以某郡爲爾之號配某官某之子彼爲駙馬爾爲公主旣入某官之門恪遵婦道以奉舅姑閨門整肅內助常佳毋累父母生身之恩爾惟敬哉其日駙馬受誥如儀誥曰夫婦之道人之大倫婚姻以時禮之所重帝女子嫁必釋勲舊爲姻此古今通義也朕今命爾爲駙馬都尉當堅

夫道母寵母慢永肅其家以稱親親之意恪遵朕
言毋怠公主受醮戒清晨具禮服辭奉先殿申
時內官陳儀仗于正宮內升陛之東西大樂陳于
丹墀執事女官備金爵酒果以俟內贊女官二人
于殿之東西

皇帝常服

皇后燕居服。陞座。公主禮服。女官導公主詣

皇帝前。贊拜。樂作。四拜。樂止。贊跪。贊受爵。女官以爵
授公主。公主飲。以授執事者。贊恭聽戒命。公主聽
受。贊興復位。樂作。四拜。樂止。女官導詣

皇后前贊拜樂作四拜樂止贊跪贊受爵執事者授爵如儀贊恭聽戒命公主聽受贊興復位樂作四拜樂止禮畢易燕居冠服命婦送至宮門引禮導公主由宮門東出過宮門西陞輦至右門內公主降輦駙馬揭簾公主陞轎儀仗鼓樂前導合女樂三十六人導至府公侯百官命婦送至府駙馬受醮戒其日早駙馬父與駙馬具祭服告祠堂畢駙馬具見尊長服見父兩拜跪揖笏執事者酌酒受飲訖父致戒已俯伏興兩拜便服上馬行親迎禮親迎駙馬具儀從鼓樂導至午門西下馬至

朝房具朝服。日曉序班二人導入午門西角門入右紅門。內官導至內使監前。公主懸戒旱。導至右門西東向立。公主至。駙馬揭簾。公主降轎。駙馬先出至府。候公主至。揭簾。公主降。同謁祠堂。謁祠堂。執事者先於祠堂設祭物畢。女使導至祠堂拜位。駙馬東。公主西。皆再拜。導駙馬詣高祖考妣神位前。公主立于拜位。贊跪皆跪。贊指笏。贊進爵。駙馬受爵授執事奠爵。再進爵如前儀。贊俯伏興。公主亦興。詣曾祖祖考妣如儀。讀祝。跪。公主亦跪。俯伏興。公主亦興。復位皆兩拜禮畢。合卺其日女

使設駙馬座于室東。公主座于室西。設拜位于座南。酒案于室中。置兩盞。兩卺于案。饌案二于室。贊引導就拜位。贊兩拜。駙馬公主相向皆再拜。各就位。執事者捧饌案以酒進。皆飲訖。進饌。皆舉饌。執事者再以酒進。皆飲。再進饌。皆舉饌。徹饌案。興就卺合和以進。皆飲訖。又進饌。皆舉饌。徹饌案。興就拜位。相向皆再拜。禮畢。見舅姑。禮。公主見舅姑。舅姑坐于東西向。公主立于西東向。行四拜禮。舅姑各兩拜。

弘治二年十月長公主婚禮儀注。公主具禮服奉先

殿辭畢詣

太皇太后四拜受爵女官贊戒恭聽戒命命之曰敬
之戒之夙夜無違爾閨門之禮公主聽受與四拜
禮畢詣

皇太后

上位

皇后前受戒命行禮亦如之下嫁如洪武儀入府設
公主駙馬拜位同拜天地行八拜禮堂內設公主
座于東西向駙馬拜位于西東向贊引二人導公
主陞座駙馬行四拜禮公主坐受兩拜答兩拜駙

馬出便服女使于室中設公主座于室西設駙馬
坐行合巹禮如洪武儀至十日具冠服女官導公
主謁奉先殿詣

太皇

太后

皇太后

上位皇后謝恩俱行八拜禮賜宴于宮中駙馬具公
服于早朝大班內謝恩仍具公服于午門外直房
俟司禮監官導至左順門內詣

太皇太后便殿行五拜禮詣

皇太后 皇后行禮如儀復導至午門外釋公服俟
上位常服出御便殿賜宴行四拜禮就席坐席向東
宴畢行五拜三叩首禮畢次日見舅姑舅姑坐于
東西向公主立于西東向行四拜禮舅姑各兩拜

教習駙馬

宣德三年詔駙馬不務詩書通古今曉忠孝仁義之
道必至怠惰驕縱何以保富貴須使親近儒生先
朝駙馬家有學錄可擇端重者一人命之教習

正統以後駙馬初授有赴監讀書祭酒以學規教之
不率者奏聞

弘治六年令駙馬將兵家諸書五倫等書在家誦讀
季終赴監試

嘉靖六年令遇選駙馬吏部推禮部主事一人教習
品官婚禮

凡品官婚娶使媒氏通書擇日納采主婚者設賓
席至日設鴈質明主婚者具祝版告廟以行賓至
女家婚氏入告贅者延賓入次主婚者公服出迎
揖賓入賓及媒氏陞自東階主婚者陞自西階至
廳賓立于左主婚者立于右媒氏立于賓南皆再
拜賓詣主人曰某官以伉儷之重施于某某率循

禮典謹使某納采。主婚者曰：某之子弗閑姆訓，既辱采擇，敢不拜嘉。賓西向坐。主婚者東向坐。陳鴈及問名禮。賓詣主婚者曰：某官慎重婚禮，將加卜筮，請問名。主婚者進曰：某第幾女某氏。出或書女第行年歲。賓辭將降出。主婚請禮從者禮畢。賓降自東階出。主婚者送至門外。納吉禮如納采儀。賓致辭曰：某官承嘉命，稽諸卜筮，龜筮協從，使某告吉。主婚者曰：某未教之女，旣以吉告，其何敢辭。納徵禮如納吉儀。加玄纁束帛函書。賓致辭曰：某官以伉儷之重，加惠某官，率循典禮，有不腆之幣。

敢請納徵。主婚者曰某官。貺某以重禮。某敢不拜受。辭畢。授函書以函書答。請期亦如納吉儀。

親迎前一日。主婚者設次於大門外。其日。婿父告于禰廟。質明。壻具公服親迎。北面再拜立。父命之曰。躬迎嘉偶。釐爾內治。壻進曰。敢不奉命。再拜。媒氏導壻之女家。其日。女氏主婚者。公服告廟。醴女如家人禮。壻至門下馬。贊者導壻就次。女從者請女盛服就寢。門內南向坐。贊者引壻出次。主婚者出迎。壻于大門之東西向揖。壻入。主婚者入門而右。壻入門而左。執鴈者從至寢戶前北面立。主婚

者立于寢戶之東西面。執鴈者陳鴈于庭堦再拜。堦出就次。主婚者不降送。婿既出。女父母南向坐。保姆導女北向四拜。父命之曰。往之女家。以順爲正。無忘肅恭。母命之曰。必恭必戒。毋違舅姑之命。庶母申之曰。爾忱聽于訓言。母作父母羞。保姆及侍女導從女出門陞車。儀衛前應送者乘車後。婿先還以俟。同牢女將至婿家。執事者設座於寢室內。婿東。婦西。設堦洗于東南。婦洗于西北。酒案于南楹。實四爵兩盃。初昏婦車至門。保姆下車。婿出迎于門內。婿揖婦入及寢門。婿先陞階。保姆導

婦後陞入室。婿盥于南洗。婦從者執巾進水以沃之。婦盥于北洗。婿從者執巾進水以沃之。盥畢各就座。舉食案。司尊者注酒徹餞。司饌者進饌徹饌。再飲再饌如初。侍六以盃注酒進于婿婦前各飲畢。贊者請皆興立于座南。東西相向。贊拜。婿婦皆再拜。侍從引婿婦入室易服。婿從者餞婦之餘。婦從者餞婿之餘。廟見。明日見宗廟。設主。婿者拜位于東階下。婿于其後。主婦拜位于西階下。婦于其後。諸親男女各于主人主婦後。其日婦夙興沐浴盛服。主人主婦就位再拜。贊者引婦進詣庭中。

北面立。主婚者詣前跪三上香。三祭酒。讀祝興主婚者立于西。婦四拜退復位。主婚者降自西階就拜位。主婚者以下皆再拜禮畢。見舅姑婦既謁廟見舅姑位于堂上。舅東姑西。婦立于堂下。俟舅姑卽座。贅者引婦就拜位四拜。保姆引婦陞自西階至舅前。侍女奉棗栗婦受之置案上。降階復四拜詣姑前。奉殿脩如前儀。降自西階至庭下拜位四拜禮畢。舅姑醴婦如家人禮。盥饋婦見舅姑之明日行盥饋禮。其日婦家備饌至婿家。婦從者設舅姑位于堂上。食案于堂中。婦夙興立于庭

下舅姑卽座婦四拜保姆引婦陞自西階至舅南婦從者舉食案執事以饌授婦婦奉饌于舅前執事者加匕筯進饌於姑亦如之食訖婦從者徹饌婦降階就拜位四拜禮畢舅姑醴婦如初見禮。

庶人婚禮

洪武元年十二月癸酉詔定凡庶人娶婦男年十六女年十四以上並聽婚娶壻服或假九品服婦服花釵大袖先使媒氏通言然後納采是日夙興主婚者告祠堂媒氏往女家至門外主婚者出迎婚氏入門而右主婚者入門而左陞座東西向立執

事者陳禮媒氏曰。吾子有惠。脫室于某某親。某有先人之禮。使某請納采。主婚者曰。某之子蠢愚。又弗能教。吾子命之。某不敢辭。媒氏授書。主婚者奉書告于祠堂。出以書復主人。禮媒氏酒饌。侑以幣。請期之日。婿氏主婚者以書及物陳于庭。媒氏奉以行。至女家。主婚者出迎。媒氏陞堂曰。吾子既修好于某。某使某請納采。主媒者曰。備物有加。敢不重拜。媒氏以書授主婚者。主婚者以書復。媒氏復進曰。某氏某請吉日。主婚者曰。某固聽命。媒氏曰。請以某甲子。主婚者曰。敢不承命。禮媒氏如納采。

儀 親迎前一日。女氏使人張陳其壻之寢室。是日質明。壻父告祠堂。醮戒。壻至女家入次。主婚者告祠堂。壻揖入奠鴈。壻旣出。女父母醮戒。侍女導從出門。陞輿。壻先還。婦至揖入。東西相向立。皆再拜。合卺。並如品官儀。見祖祢。婦至之明日。見祖祢。如品官儀。見舅姑。如品官儀。舅姑醴婦如家人禮。婦至之明日。壻往見婦之父母。至大門外立。俟婦父出迎。揖壻入。幣從之。婦父陞自西階。壻陞自東階。至廳。東西相向。贊四拜。婦父扶壻。與以幣。進婦父受。以授左右。壻入後堂門外。少俟。幣從之。

婦母出後堂南向立。婿前楹北向立。贊四拜。婦母答拜。以幣授婦母之左右。贊禮導婿出次。見婦黨如賓客相見之禮。婦禮酒饌禮婿。隨貧富之儀。

論曰。禮云婚禮下達。則六禮之行。無貴無賤。儀禮無君昏之儀。僅載士禮。孔子家語晁而親迎。夏迎于庭。殷迎于堂。周迎于戶。故曰。明王必敬妻子也。周禮媒氏掌萬民之判。則里巷閨帷之事。上之人且殷心焉。春秋書祭公紀遣使之制。漢太子以奉常往迎。唐皇子以親王主婚。六禮之行。皆稱寡人義誼不倫焉。

高皇帝官天地而理萬物。制爲軌物。自至尊以逮親王。皆臨軒遣使。五年詔曰。古之婚禮。結兩姓之歡。以重人倫。近代以來。專論聘財。習染奢侈。令中書省議制頒行。務崇節儉。以厚風俗。洋洋聖謨。禮樂明備。然大婚之儀。始行于正統。而東宮以下。代有損益。公主下降駙馬相見之儀。漸非洪武之舊矣。民間之俗。五方不同。而六禮一也。山坵海壩。涵濡休明。盡倫盡制。洋洋乎大哉。

皇明典禮志卷之九終